

230.149
41
1-13

博愛醫院

懷寧縣志

中華民國四年
十二月印

序

懷寧爲縣始於晉義熙中屬晉熙郡梁末屬豫州尋屬晉州北齊屬江州陳復屬晉州隋初屬熙州大業初屬同安郡唐武德四年屬舒州天寶初復屬同安郡至德初屬盛唐郡乾元初復屬舒州宋政和五年屬德慶軍紹興十年屬安慶軍元屬安慶路明初屬江寧府尋屬安慶府清因之民國元年府廢而是縣直屬於省地方百餘里山清水秀致足賞愛其尤勝者曰大龍山往者先大夫督學安徽余雖侍側曾未一遊嘗以爲憾其後余轉官吉林相去遼遠且係官於朝不得來遊爲憾滋甚民國二年被

命爲安慶道尹私喜得償所願以簿書填委又不暇一遊然登城遠眺則顯然在余目前峯巒巉巖堪嚙隱倚下瞰大江潰瀆洩滂溼瀆潰瀑其奇絕如是則淑靈和清之氣必旁魄而鬱積於此意必有碩儒義士生其間不見於今亦必已生於古今年某月閱朱君之英所續修是縣之志其載碩儒義士甚多乃掩卷慨然而笑曰余向之揣測果不謬矣未幾朱君來謁余爲序余以爲縣志有關於世人皆知之固不足序獨序其山川之勝以答朱君之請焉

中華民國五年四月一日安慶道尹徐鼎康撰

序

懷寧山邑也元以後始改今治背山面江襟帶吳楚屹然爲東南一重鎮蓋六七百年於茲矣然懷邑附郡城故郡有志而邑舊無志有之自襄城賈壯令懷寧始賈君前清順治間人迄康熙道光同治三朝志皆時有修纂獨同治間纂輯未歲事亦闕歲紀代有變遷國步旣更叢殘易失不有作者其於風俗之推移政教之因革復何以嗣往績而詔來茲乎朱君叔琴長是邑且一載餘矣間從政暇與邦人君子勤相討論掇故拾遺以修舊乘凡十閱月而書告成大綱十有四子目六十有四其紀述一宗道光書爲主體而參以同治志之可採擇者斟酌損益又

加詳焉余觀道光本重典瞻同治重博大而尤善夫同治本所謂在國史則必紀其禮樂政教制作之本原而在方州志則亦著其禮樂政教率由之明效經正民興斯無邪慝以爲作志者實與有責美哉言乎此可不深長思歟余以州縣官河洛間見夫人物樸厚風化淳茂慨然想見三代之直唐俗勤儉之遺及來此邦而知院猶古邑其勤學勵俗未嘗廢墜茲編所志將以繼述憲章維持世教俾後之考風者藉鑑有資非徒一時之網羅掌故已也邑多賢者儻亦謹余斯言耶

歲在柔兆執徐孟陬月武進鄭鴻瑞序

序

中華民國四年十二月懷寧續纂縣志成主任舒君景衡屬之英序其首並告曰此書自清道光五年纂輯後同治間一爲重修是時任分纂者爲邑人馬鍾山徵慶京卿先族兄調笙卓元明府任郵案者爲王子誠志行徵君事未竣未獲刊行後書存馬京卿處修訂纂輯越十餘年考古證今徵求允當成書十已八九京卿臨終時屬其弟潤山定業茂才將已成各稿檢一分付景衡并傳遺命曰是有望於子也倉皇受命無任主臣以蚊負山時虞失墜光緒辛丑謀於陳堯齋際唐方伯承籌款繕清稿屬洪朗齋思亮陳潤甫同禮兩太史續輯未能舉事乙巳陳

懷寧縣志

卷首序

一

方伯復屬景衡竟是役亦未克行上年我公來首以是書應續纂爲士民告疊召七鄉士紳集議僉謂宜速重修况當國步更移典章應有因革尤爲繼往開來之盛業爰約同人籌捐從事方伯陳公復首集巨款於本年三月開局採訪七月編書十二月編竣四十餘年未竟之業十閱月成之不惟足副我公殷殷屬望之誠亦藉以釋景衡二十載鄉先生付託之重何幸如之之英聞不禁喟然曰有是哉天下事殫精竭智謀之數十年而不能成者一旦興廢繼絕不閱歲而告歲焉此其間殆有莫之爲而爲者歟公餘之下披誦再三竊見崇實黜華敦禮守信爲此邦固有之本性蓋由山川蘊蓄之深厚先德教澤之宏遠故

發見於其間者類能昌大世運蔚爲國華其間所書沿革不矜附會序山川務尋脈絡誌分野不載凌犯述人物必稱名實在志林中尤爲傑出此番續纂諸君子抱述而不作之旨折中於道光同治兩志之間採補磨續斟酌損益詳見凡例誠亦具苦心矣之英上年奉長官檄承乏是邦值百廢之未興更瘡痍之滿目匡置撫翼在在爲難幸年穀順成稍寬咎戾今得與邦之賢士大夫朝夕攷訂別僞辨訛親見刷印告成并諸賢士大夫書名卷首果何修而得此也然竊有爲懷寧士民告者方今天下困紛擾久矣懷寧居長江要衝城爲省會五方雜處良莠不齊戊申己酉辛亥壬子四經變亂精英潰竭城鄉自好類多潔

身遠引置理亂於不聞以至士習漸近囂漓民俗亦驅浮靡一二救世情殷之彥欲一振艱難凋敝每慨展布無從而欺世盜名營私罔利者遂不免雜出其間爲世垢病之英撫字無能激揚有願尙冀我賢士大夫提倡於上廣爲振興學校以培養本根相與敦崇節儉以珍惜物力在野者風行於下力稼穡以開衣食之源惇孝弟以重人倫之本尤各本范文正匹夫有責之心爲大地謀休養生息匡之英所不逮勗之英以未能是尤之英寤寐以求馨香以祝者也行見戶敦禮讓風復義皇後之續是篇者秉筆直書垂爲世範寧獨此邦一時之慶亦鄉先生千秋光也卽書之質舒主任暨分纂諸君其以之英爲知言否也

乙卯仲冬江寧朱之英撰

懷寧縣志

卷首序

三

序

壬子孟夏余解組綬還自北庭南望鄉邑惘惘然靡稅駕之所
乃結廬沽上杜門韜景謝絕塵事久之客有自南中來者爲言
吾鄉兵氣漸消治具飭理則爲之色然以喜越二歲又聞吾邑
將修輯縣志而舒君怡笙果馳書來告屬余總纂志役謂出於
邑人公意余固遙謝且曰某嘗有志於是曩在籍聞先輩馬鍾
山先生著稿盈篋卒未成書私願奔走醵資廣續其業而塵俗
牽累未遑將事日月如馳忽忽十餘年矣今耄而廢學烏足語
於文字之職惟是初志所在不可以昧余寧旣其實而辭其名
苟有餉益於吾黨者敢不竭誠贊助以從二三君子之後而以

际無忘桑梓之義怡笙報書曰可絲是郵簡往還頗有商榷丙
辰初春編輯旣竣怡笙復以書來請得一言以弁其首嗚呼余
之思鄉久矣一爲展覽是編歷歷焉接余心目者吾祖宗之邱
墓無恙也田園廬舍未改也吾童時登臨之山枿然而高釣游
之水悠然而深景物依然未有異也歸與歸與吾豈無意於斯
與然而參之地形驗之人事若有所做於余衷而尼之使不得
遽歸者周人之詩曰民亦勞止汽可小休吾邑之民勞矣而小
休無時吾用滋思而於茲編之成安得不益感愴於心而悄悄
不能已也

歲在游兆執徐建寅之月邑人陳際唐序

舊序

蓋古列國之有史卽今郡邑之志也其一國政治及他國赴告策書皆直載於簡以遺後人然代久亦多關略考正甫抱商頌十二篇於周太師至刪詩止存其五距定哀指隱桓不無見聞傳聞異辭諸如夏五郭公多存疑耳矧輓近世變屢更而皖地又屢中軍烽故籍銷沈壯甚慨之故不揣鄙陋而亟欲爲懷寧志也懷舊無志統於郡志今雖修實剋古稱史有三難必才學識兼備而後可作而懷志亦有三難自晉迄宋濶統於懷自元以後濶分於懷述古不採濶多掛漏全採又屬摭摭其難在孤行他邑各自爲區懷獨附郡郡城卽懷城安危一體其難在合

紀懷夙多文獻兵燹以來巨室邱墟家乘失傳儒宿荒訓其難在延訪壯爲網其放失詢諸故老考稽百年約其條目凡山川城郭功業文藻忠臣節婦財賦盈縮風俗淳澆悉詳載之文務簡核罔敢泛濫事務確實罔敢溢美至若褒貶勸懲尙竢良史筆削而檢閱苦心或可備董倚之一助云郡舊志成於天水胡公公具遷固才距今又三世矣其中變革益繁大哀集成帙續貂之誚知不免焉順治辛卯襄城賈壯序

今上御極之十有一年詔京省進呈通志彙集一統全書洵煌煌乎巨典也哉聖天子良法美意將以總方略一統類廣教化美風俗也顧京省之志裁於郡志而郡志裁於邑志是邑志者

國史之權輿也鼎臣承乏懷邑謬膺茲典僉荒固陋實惴惴不克荷幸舊志成於前令襄城賈壯余得畫一其法而無虞於大戾然壯之成書在順治辛卯去兵燹未幾猶草昧初開之候其書多放失而未詳况乎閭閻之登耗風俗之淳漓人物之盛衰政教之得失皆與時爲推移非若山川疆域之一成不變者也然則二十餘年之後尙可因仍踵襲而弗事稽討已乎鼎臣雖鞅掌簿書勉事筆墨日集二三儒流相與揚榘舊聞諮諏近事編摩屢月克奏成書身雖無狀奉官治慙上理而前言往行仰止怡心吏治民風書紳警目豈惟仰奉憲章亦賴是以自箴其瘼曠耳下體菲葑用備採擇至銀根亥豕之謬貽譏博雅惟諸

上臺裁成而扶進之庶幾瓦缶之鳴附鐘呂而奏盛世之元音也已康熙癸丑遼東段鼎成序

皖轄六邑懷其附郭也枕三吳而控全楚背淮泗而吭豫章江聲山色郡與邑同之而未雨之綢繆軍興之供億戴星出入不遑暇食守與令亦大略同之幸邇歲多方蕩平海內清晏皖亦稍罷征調而縉紳東西行轡軒南北過地主人之禮復僕僕不容廢爲斯守若令者期會奔走而外重以簿書何復餘閒索筆墨爲古文辭然亦有不容以不敏謝者則以國家龍興鼎定文治聿彰郡縣志凡三修矣茲復以將志一統檄郡縣重修雖其所增加於舊無幾然比櫛搜剔守若令敢不盡心焉乙丑夏懷

寧崔君新志成屬余覽焉蓋以其附郭故而山川風土人物事蹟大略與郡志同尤愛其詳而不蕪質而不僂爲稱善者再崔君因乞予序予何言哉夫封疆經緯則皆有圖古今沿革則皆有誌鄉賢名宦則皆有傳僊踪釋子亦附緒餘序記歌行概爲編輯予何辭之容贅亦惟以供職之維艱與保民之不易爲賢者告之今設相與披按圖籍我疆我理如錯如繡其何以豐阜與夫風俗返淳遵何道宿弊之盡別用何術此皆有文字之可尋與義理之可按若夫憑墟弔古以挹風流染翰揮豪以示文采微論不能亦非所急予無善績僅以能言願與爾令相率勉之以祈稱上德意是則郡守之序言云爾康熙乙丑山西解州

安邑劉樞撰

今天下大一統矣東南一尉西北一侯無論鴟張豕突之區化爲麟遊鳳舞之域卽普天率土莫不斂衽傾心懷正朔而奉冠裳蓋駸駸乎旅獒越雉之盛焉我皇上撫有金甌職方罔外爰詔天下省郡邑咸以輿圖獻非誇疆索也欲以覽山川悉風土觀民物於展玩間寓古聖王巡方覲后之意綦重典也安慶爲古皖伯封而懷首邑也上接荆襄下據吳會非屹然一保障哉其地三面襟帶江湖而大龍百子蔚然相望中多隱君子焉地沃而俗儉民淳而士雅孝子悌弟貞婦順孫踵相接而肩相望也江左號稱易治而懷其尤也予久淹蓬戶穩聞江南都邑之

盛於客歲承乏茲土與懷士民相見時驅車適野省其室廬且觀其學校與薦紳先生相考道問業不禁心焉異之至案牘稍清從容退食之餘檢邑乘讀之殆與前所見者實彷彿云其言風俗所謂力田忠厚者不啻與農夫牧豎相接於野也其言人物所謂磊落英多者不啻與學士大夫相揖於廷也其言形勢地產所謂堞高而塹深魚肥而穀饒者不啻履其地入其肆觀於目而樂於心也猗歟休哉非涵濡於聖澤之深休養於諸憲司之久烏克有此一日者天子輟萬幾披乙夜進九州之版圖而親覽焉見有雄關百二其俗勁以悍非秦中乎河山表裏其風憂以思者非三晉乎敦詩說禮茲誦不衰者則齊魯之邦也

虎踞龍蟠方城漢水者則吳楚之域也其他如越如閩如滇如粵如巴蜀如黔中無不隨其方而異其俗同其化而殊其風而於其間忽有彈丸之地爲國家之重鎮寄焉爲古今之人材聚焉則皖之懷邑也雖蕞爾區禹甸堯壤初無同異然而宣城俗美亦以南國之一隅瞻光華之四被也天子顧之喜可知已予蒞任之初適邑乘續修將竣竊幸得觀其成因不揣荒陋而爲之序襄陵張君弼撰

志者古史之遺也郡邑之志古列國之史之遺也安慶首楚尾吳爲江南大都會統屬六邑邑首懷括六邑之志以成郡志蓋載懷事居多焉其間山川風土之紀忠孝節烈之事名儒耆碩

之人吏茲土者後先編輯而存諸志既班班矣歲在乙丑予以
防政來官而我堂臺刺史劉公纂修蚤竣予受而披覽之而古
舒六邑地臥遊而得焉及其後各憲臺鉅公大人修廢舉墜多
所營建而良法美政創所未有類皆有造於學校民生有裨於
地方風俗一二年間釐然大備而志乘先此告成缺未及載未
免遺憾耳夫以千秋不朽之事而必俟之十餘年後修志之人
保無湮沒是懼乎無何皖郡紳衿呈請增輯實獲我心矣乃爲
詳允於藩憲而郡志於是乎成若懷邑志則郎官事也予何役
役爲蓋自客歲懷令崔子遷任予曾兼此百里事公餘片晷中
搜攬史冊而殘編剩牘冷置篆胥架上問其故版零落無復存

者爲愀然久之嗣令張子來涖此邑方鞅掌簿書人物風紀多
所未諳語云造浮圖者必合其尖予不能辭此事矣爰搆舊本
增訂成帙遂捐俸梓之而前所缺未及載者今日炳炳燁燁予
竊用自慰焉抑尤有說自董狐南史之不作而史幾難言之是
役也一筆一削予未嘗以已見直書類皆揚厲盛德推崇至治
之事一二操觚子循循如游夏焉亦欲使後之吏茲土者知所
觀感也若夫過此以往留藍藁於來茲筆削之權又在繼起之
君子云康熙丙寅奉天海城裴國熙序

國家之有一統志固廣大悉備矣而必以郡邑爲權輿則郡邑
之有志其亦禹貢辨土周官職方之遺意乎顧疆圉沿革古今

都有修廢舉墜居官者之責琴瑟不調取而更易之非以文藻相矜新也懷邑雄據上游且爲大府駐節地風土人物之盛甲於江南甲申冬余來令茲土念舉家世沐聖恩高天厚地報稱無自日大人筮仕中外數十年飲冰茹蘗久爲海內共鑒予卽竭力承志日夜冰兢猶恐不能仰報國恩於萬一用是蒞任之始指天誓日刻苦自持儉以助廉勤以補拙務以潔己愛民自勵舉凡興利除弊抑強扶弱編審平糶勸農課士諸大政皆矢公矢慎不畏強禦不避嫌怨六年於茲心力俱瘁幸得次第就理豪強不致梗化痼瘵俱有起色且歲值豐稔野有蓋藏士勵廉隅家敦茲誦懷邑之民固已欣欣向化更逢葉大中丞榮

膺特簡保釐南服加意撫綏十郡赤子無不共躋春臺而懷邑士民尤爲向場花木受恩最先孤衷勞吏得以宣德達情承流布化四境之內盡雍雍然有太和景象今復蒙加意文學振興書院拔士之茂才延師課之稟旣膏火區畫備至多士鼓舞蔚起文教之盛固白鹿鷺湖所未有也且城郭完葺金湯鞏固舊觀名勝煥然興復懷邑雖舊景物一新矣近又開濬河道俾行舟往來無長江波浪之險而懷民因之得以通有無資蓄洩皖邦萬世之利莫大於此不有紀載何以示後大中丞博極羣書留心典籍固深以缺略爲憾而予職任茲土又何可以不文辭乎爰卽舊志所載殫心校讐兢兢乎不敢苟卽藝文一志亦必

取其裨於地方關於風化者登載之不敢濫也至前志載筆允當悉仍其舊不敢掩爲己功他如傳聞異辭或耳目不及周之處姑從其闕以俟後之採風者備錄焉噫自有懷以來官斯土者未易更僕數矣然披閱之下後之人猶得指而目之曰某也若何某也若何余於懷誠不知無負與否顧念孤衷勞吏期爾皖人士相與回心而嚮道亦幸爾皖人士諒余六載之苦衷蒸蒸然風俗日卽於古而余亦藉是以告無罪也繼自今懷之父老子弟秀者服詩書樸者安畎畝匪彝不作逸志不生爲此邦山水增色是所望於將來之賢令長暨生斯土者之賢紳士精白乃心維持教化善自愛以爲斯民表率此則葉大中丞命余纂輯故事已也是爲序康熙庚寅遂甯甯張懋誠撰

修志之深心亦卽余始終諄諄告誡懷人之至意而非徒僅爲纂輯故事已也是爲序康熙庚寅遂甯甯張懋誠撰
古者列國皆有史史所紀錄謂之志周官小史掌邦國之志外史掌四方之志蓋卽後世郡縣志所由昉矣取郡縣志而薈萃之則有省志取省志而薈萃之則有一統志是郡縣志之修尤宜先也然非敦崇實際自別於流俗者每視爲不急之務而不肯修非貫串古今有史氏之三長者卽修焉亦不能犁然而有當安徽於直省隸江南道光元年冬余以簡命來蒞此邦小行人適四方以五物各爲一書每國辨異之以反命於王以周知天下之故使者事也往時江南通志合上下江以成書紀載或

不能盡具非有專志無以綜此邦文獻之大全余乃檄各牧令先修郡縣志將彙而集之而懷寧爲附省首邑諸所應載之事視他縣尤多王君毓芳以簿書之暇與邑之紳士從事焉其距舊志之修已百有餘載時代遼闊斯民長老多就湮沒取證尤難王君網羅墜簡摺拾舊聞甫將成書迫於引見之限匆匆入都趙君梅繼之始獲歲事其書囊貫古今粲然具備成一邑之典則用心可謂勤矣又所糾正舊志數十條可以知人可以論世以是爲省志抵本而冠八郡五十餘州縣之首卽孰不先睹爲快哉獨惜省志之修余方奏聞報可而適有江蘇之調未得躬竟其事喜懷寧志之先成於省志爲有基也爰書以弁之道

光五年歲次乙酉季冬月望日兵部侍郎巡撫江蘇等處地方前安徽巡撫兼提督安徽布政使福建山西按察使四川川東兵備道吏科掌印給事中掌陝西道監察御史翰林院編修充國史館纂修楚南陶澍撰

今上御極之元年毓芳始自歛調懷寧令又三年來蒞治所至之日當大浸後賑事甫畢哀鴻嗷嗷勞來安集之不瞻其於邑之舊聞墜簡遺俗流風一切未暇及也中丞長沙公樹元氣嘯陽和歲以大稔乃檄所屬郡縣各修方志將薈萃爲安徽通志所以嘉惠邦人潤色鴻業而傳之無窮者其意甚偉維懷於省爲首邑附郭諸宜紀載之事視他邑爲最先余既承乏茲土其

何敢以不文謝謹案懷邑志順治辛卯賈侯草創於前康熙癸丑段侯賡續於後丙寅崔侯又續焉庚寅張侯三續焉六十年中操觚四易何其勤也自康熙丙寅以來又百餘年矣山川清淑之發洩文章忠孝之流傳與時遞積曾無有爲之網羅放失勒成一書又何闕也夫史莫難於志昔人蓋嘗論之不知爾雅職方九州之判不可與言地理不知禹貢厥貢錫貢之辨不可與言食貨不知孔子先進野人之從不可與言風俗不知司馬遷老莊申韓同傳不可與言人物國史然邑志何獨不然余嘗取歷代諸志考其得失以一邑之人紀一邑之事耳目近則是非宜公是非公則去取宜當然往往有共聞而衆見者或牴牾

不合焉豈古之良史竟不可望於後世抑後世志多出於官修苟務成編而已載筆者有不能盡其才乎夫志家通患於古患疏而於今患徇疏則道聽而塗說徇則令色而巧言余雖不敢自附於知史法竊於此盡心焉邑之諸君子實有同志相與考獻徵文類族辨物不以游談誣古人不以假借欺後世惟其謹也書旣成文省而事增述半而作倍於以備一邑之掌故而爲省志之權輿開卷之益將在於是其有不逮更俟有道就而正焉道光五年八月齊東王毓芳序